



ზოგადსაგანმანათლებლო
დანესაბუღებების ავტორიზაციის საბჭო

02/05/2025



MES 7 25 0000472958

გადაწყვეტილება

**ზოგადსაგანმანათლებლო დაწესებულებების ავტორიზაციის საბჭოს 2023 წლის 13 ნოემბრის
N1537604 ოქმის მე-8 ნაწილში ცვლილების შეტანის შესახებ**

ზოგადსაგანმანათლებლო დაწესებულებების ავტორიზაციის საბჭოს სხდომაზე გამოვლენილი გარემოებების შესწავლის, შეფასებისა და ურთიერთშეჯერების შედეგად, საქართველოს ზოგადი ადმინისტრაციული კოდექსის 63-ე მუხლის პირველი პუნქტის საფუძველზე,

საბჭომ გადაწყვიტა:

1. შევიდეს ცვლილება ზოგადსაგანმანათლებლო დაწესებულებების ავტორიზაციის საბჭოს 2023 წლის 13 ნოემბრის N1537604 ოქმის მე-8 ნაწილში და ჩამოყალიბდეს შემდეგნაირად:

**„8. სსიპ - გალაკტიონ ტაბიძის სახელობის ქალაქ თბილისის N51 საჯარო სკოლის
ავტორიზაციის საკითხის განხილვა**

საბჭოს თავმჯდომარემ, დავით მაღაზონიამ, დაწესებულების წარმომადგენლებს მიმართა, ხომ არ ჰქონდათ საბჭოს წევრების მიმართ აცილება. დაწესებულების წარმომადგენლებმა დაადასტურეს, რომ საბჭოს წევრების მიმართ აცილება არ ჰქონდათ. საბჭოს წევრმა, მაკა მამფორიამ და ეკატერინე კვირიკაშვილმა განაცხადეს, რომ ის ვერ მიიღებდნენ აღნიშნული საკითხის განხილვასა და კენჭისყრაში მონაწილეობას, რადგან აღნიშნულ სკოლასთან ჰქონდათ ინტერესთა კონფლიქტი. საბჭოს წევრებმა გაიზიარეს აღნიშნული შუამდგომლობა.

საბჭოს თავმჯდომარემ მიმართა საბჭოს წევრებს, დაედასტურებინათ, რომ იცნობდნენ ავტორიზაციის ექსპერტთა ჯგუფის დასკვნას და დაწესებულების მიერ წარმოდგენილ არგუმენტირებულ პოზიციას დასკვნის პროექტთან მიმართებით. საბჭოს წევრებმა დაადასტურეს, რომ იცნობდნენ საქმის მასალებს. საბჭოს თავმჯდომარემ ჰკითხა დაინტერესებული მხარის წარმომადგენელს იცნობდა თუ არა ავტორიზაციის ექსპერტთა

ჯგუფის დასკვნას. წარმომადგენელმა დაადასტურა, რომ იცნობდა დასკვნას. შესაბამისად, საბჭოს თავმჯდომარემ საბჭოს მდივანს სთხოვა, რომ ექსპერტთა ჯგუფის დასკვნა დაერთო ოქმისთვის, როგორც მისი განუყოფელი ნაწილი.

ექსპერტთა ჯგუფის დასკვნა სხდომაზე წარადგინა ექსპერტთა ჯგუფის თავმჯდომარემ, ხათუნა ლოდიამ. მისი თქმით, სსიპ - გალაკტიონ ტაბიძის სახელობის ქალაქ თბილისის N51 საჯარო სკოლაში საავტორიზაციო ვიზიტი განხორციელდა 2023 წლის 21 და 22 სექტემბერს. სკოლა მდებარეობდა ქ. თბილისში, პეტრე მელიქიშვილის N2-ში, ახორციელებდა ზოგადი განათლების დაწყებითი, საბაზო და საშუალო საფეხურების ზოგადსაგანმანათლებლო პროგრამებს, ქართულ ენაზე. ზოგადსაგანმანათლებლო დაწესებულების სტატუსის მამიებლის თვითშეფასების ფორმის თანახმად, დაწესებულების მიერ მოთხოვნილი მოსწავლეთა ადგილების ზღვრული რაოდენობა შეადგენდა 2000 მოსწავლეს.

ექსპერტმა განაცხადა, რომ ოთხივე სტანდარტი შეფასდა, როგორც „შეესაბამება სტანდარტის მოთხოვნებს“. თუმცა, აღნიშნა, რომ მესამე სტანდარტის 3.4. და 3.5 კომპონენტები შეფასებული იყო მეტწილი შესაბამისობით.

ეხათუნა ლოდიამ აღნიშნა, რომ თითოეულ მეტწილად შეფასებულ ინდიკატორთან დაკავშირებით, ექსპერტთა ჯგუფის მიერ გაცემული რეკომენდაციები აღწერილი იყო ზოგადსაგანმანათლებლო დაწესებულების სტატუსის მამიებლის შესახებ ზოგადსაგანმანათლებლო დაწესებულების ექსპერტთა ჯგუფის დასკვნაში. დასკვნა ასევე მოიცავდა ექსპერტთა ჯგუფის მიერ გაცემულ რჩევებს.

ექსპერტმა სკოლის საუკეთესო პრაქტიკის ფარგლებში აღნიშნა, რომ სკოლას რადიო „საქართველოს ხმასთან“ გაფორმებული ჰქონდა მემორანდუმი, რომლის ფარგლებშიც მოსწავლეები ამზადებდნენ გადაცემას სახელწოდებით „მოსწავლის ხმა“. მან დასძინა, რომ მოსწავლეების მიერ მომზადებული გადაცემები ბოლო ოთხი წლის განმავლობაში იკავებდა რადიო „საქართველოს ხმის“ საეთერო ბადეს.

საბჭოს თავმჯდომარემ მიმართა საბჭოს წევრებს, ხომ არ ჰქონდათ შეკითხვები სკოლის წარმომადგენლებთან ან ექსპერტებთან.

საბჭოს წევრმა, პეტრე ბაბილუამ, ყურადღება გაამახვილა სკოლის მიერ წარმოდგენილ კურიკულუმებზე და ექსპერტებს მიმართა კითხვით, დაეზუსტებინათ, როგორ ხდებოდა აღნიშნული კურიკულუმების შეფასება ავტორიზაციის პროცესში და როგორ წარმომართა მასწავლებლებთან შეხვედრისა და ინტერვიუების პროცესი. დასმული შეკითხვის საპასუხოდ, ესთეტიკური აღზრდის საგნობრივმა ექსპერტმა, ნათია მაკრახიძემ აღნიშნა, რომ მუსიკასა და ხელოვნებაში წარმოდგენილი კურიკულუმები იყო სრულყოფილი და გამართული. საზოგადოებრივი მეცნიერებების საგნობრივმა ექსპერტმა, ეკა კობიაშვილმა, განაცხადა, რომ დაწესებულების მიერ წარმოდგენილ კურიკულუმებში ჩანდამასწავლებლების აქტიურობა და ჩართულობა. სკოლაში ჩამოყალიბებული იყო არაერთი კლუბი, რომლის ფარგლებშიც ხორციელდებოდა მრავალფეროვანი პროექტები. მათემატიკის საგნობრივმა ექსპერტმა, ნანა ცინცაძემ, დაამატა, რომ კათედრის წევრებთან გასაუბრების შედეგებზე დაყრდნობით, მასწავლებლები აქტიურად ახორციელებდნენ, როგორც კომპლექსურ დავალებებს, ასევე, ინტეგრირებულ გაკვეთილებსა და სხვადასხვა სახის პროექტებს. სახელმწიფო ენის საგნობრივმა ექსპერტმა ნანა შალამბერიძემ აღნიშნა, რომ იგი იზიარებდა კოლეგების მოსაზრებებს.

საბჭოს თავმჯდომარემ მიმართა ექსპერტებს, დაეზუსტებინათ, ჰქონდა თუ არა დაწესებულებას დასკვნა შენობა-ნაგებობის მდგრადობის შესახებ. დასმული შეკითხვის საპასუხოდ, ექსპერტმა, ხათუნა ლოდიამ, განმარტა, რომ სკოლის მხრიდან შესაბამისობის გეგმასთან ერთად წარმოდგენილი იყო სსიპ- ლევან სამხარაულის სახელობის სასამართლო ექსპერტიზის ეროვნული ბიუროდან მიღებული შენობა-ნაგებობის მდგრადობის შესახებ დასკვნა, რომლის საფუძველზეც, სკოლის შენობა სეისმომდებლობასთან სრულ შესაბამისობაში არ იყო, თუმცა, მოცემულ ეტაპზე იყო უსაფრთხო. სკოლის დირექტორმა აღნიშნა, რომ დასკვნაში ხაზგასმული იყო ის ფაქტი, რომ სკოლისთვის საფრთხეს წარმოადგენდა 8-ბალიანი მიწისძვრა. აქვე, დავით

მაღაზონიამ, კითხვით მიმართა დაწესებულების წარმომადგენლებს, დაეზუსტებინათ, როგორ გეგმავდა სკოლა შენობის ადაპტირებას. სკოლის დირექტორმა აღნიშნა, რომ შენობის ადაპტირების მიზნით, სკოლამ წარადგინა მიწერილობა შესაბამის სამსახურში, საიდანაც სკოლამ მიიღო ინფორმაცია, რომ სსიპ - გალაკტიონ ტაბიძის სახელობის ქალაქ თბილისის N51 საჯარო სკოლის სრულად ადაპტირება დაიგეგმებოდა 2024 წლის ბიუჯეტის ფარგლებში. საბჭოს თავმჯდომარემ დავით მაღაზონიამ მიმართა საბჭოს წევრებს, ხომ არ ჰქონდათ შეკითხვები სკოლის წარმომადგენლებთან ან ექსპერტებთან.

საბჭოს წევრებს შეკითხვები არ ჰქონდათ.

საბჭოს თავმჯდომარემ კენჭისყრაზე დააყენა სსიპ - გალაკტიონ ტაბიძის სახელობის ქალაქ თბილისის N51 საჯარო სკოლის ავტორიზაციისა და მოსწავლეთა ადგილების ზღვრული რაოდენობის 2000-ით განსაზღვრის საკითხი.

კენჭისყრის შედეგები:

მომხრე - 9

წინააღმდეგი - 1

საბჭოს ერთ-ერთმა წევრმა განმარტა, რომ, ვინაიდან, დაწესებულებას არ ჰქონდა სახანძრო უსაფრთხოების მოთხოვნებთან შესაბამისობის შესახებ დასკვნა, ასევე, საგანგებო სიტუაციების მართვის შეთანხმებული გეგმა, შესაბამისად, მოსწავლეთა უსაფრთხოებისა და მათი საუკეთესო ინტერესებიდან გამომდინარე, იგი მხარს არ უჭერდა სკოლისთვის ავტორიზაციის მინიჭების საკითხს.

გადაწყვეტილება:

„განათლების ხარისხის განვითარების შესახებ“ საქართველოს კანონის მე-11 მუხლის მე-2 პუნქტის „ა“ ქვეპუნქტის, მე-12 მუხლის, საქართველოს განათლებისა და მეცნიერების მინისტრის 2010 წლის 1 ოქტომბრის N99/ნ ბრძანებით დამტკიცებული „საგანმანათლებლო დაწესებულებების ავტორიზაციის დებულების“ მე-20 მუხლის პირველი პუნქტის „ა“ ქვეპუნქტის და 21-ე მუხლის პირველი, მე-2 და მე-3 პუნქტების შესაბამისად, სსიპ - გალაკტიონ ტაბიძის სახელობის ქალაქ თბილისის N51 საჯარო სკოლას (ს/კ: 203850699) 9 წლის ვადით მიენიჭოს ზოგადსაგანმანათლებლო დაწესებულების სტატუსი და მოსწავლეთა ადგილების ზღვრული რაოდენობა განესაზღვროს 2000- ით.

დაწესებულებას მიენიჭოს უფლებამოსილება განახორციელოს შემდეგი ზოგადსაგანმანათლებლო პროგრამები:

N	ზოგადსაგანმანათლებლო პროგრამის სახელწოდება	ზოგადსაგანმანათლებლო პროგრამის საფეხური	ზოგადსაგანმანათლებლო პროგრამის განხორციელების ენა	ზოგადსაგანმანათლებლო პროგრამის განხორციელების ადგილი (მუნიციპალიტეტის, ქალაქის, დაბის/სოფლის და ქუჩის მითითებით)
1	ზოგადი განათლების დაწყებითი საფეხურის ზოგადსაგანმანათლებლო პროგრამა	დაწყებითი	ქართული	თბილისი, პ. მელიქიშვილის ქუჩა N2
2	ზოგადი განათლების საბაზო საფეხურის ზოგადსაგანმანათლებლო პროგრამა	საბაზო	ქართული	თბილისი, პ. მელიქიშვილის ქუჩა N2
3		საშუალო	ქართული	თბილისი,

ზოგადი განათლების საშუალო საფეხურის ზოგადსაგანმანათლებლო პროგრამა			პ. მელიქიშვილის ქუჩა N2
--	--	--	-------------------------

საბჭომ 3.4 და 3.5 კომპონენტების შეფასების გათვალისწინებით, ზოგადსაგანმანათლებლო დაწესებულებას განესაზღვრა რეკომენდაციები და რეკომენდაციების შესრულების პროგრესის შესახებ ცენტრის ინფორმირების ვალდებულება 2027 წლის აპრილში. კერძოდ, წარმოედგინა დასკვნა შენობა-ნაგებობის სახანძრო უსაფრთხოების მოთხოვნებთან შესაბამისობის შესახებ, ასევე, მტკიცებულებები იმისა, რომ საბუნებისმეტყველო ლაბორატორიას სკოლა აღჭურვიდა ამწოვი კარადითა და უზრუნველყოფდა ეტლით მოსარგებლე მოსწავლეებისთვის სართულებზე გადაადგილების შესაძლებლობას. „

2. ზოგადსაგანმანათლებლო დაწესებულებების ავტორიზაციის საბჭოს 2025 წლის 02 მაისის N471854 სხდომის ოქმის მეორე ნაწილი ცნობილ იქნას ამ გადაწყვეტილების განუყოფელ ნაწილად.

3. ზოგადსაგანმანათლებლო დაწესებულებების ავტორიზაციის საბჭოს გადაწყვეტილების გასაჩივრება შესაძლებელია კანონმდებლობით დადგენილი წესით და ვადაში, სააპელაციო საჩივრის სააპელაციო საბჭოში წარდგენის გზით (შემდეგ მისამართზე: ქ. თბილისი, მ. ალექსიძის ქ. მეორე შესახვევი №2) ან ქ. თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით (შემდეგ მისამართზე: დავით აღმაშენებლის ხეივანი, N64).

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
საბჭოს მდივანი
ბერიკაშვილი ნინო

ბ. მელიქიშვილი

მ. მ. მელიქიშვილი

სსიპ-განათლების ხარისხის განვითარების ეროვნული
ცენტრი
ზოგადსაგანმანათლებლო დაწესებულებების
ავტორიზაციის საბჭო
მოადგილე/საბჭოს სხდომის თავმჯდომარე
მამსიკაშვილი თამარი

